

# Raina I Traem Bakegen

**I kam long Jane Choate**  
(I kamaot long wan tru stori)

*Stori ia i hapen long YSA.*

Raina i ridim ol toktok long posta long skul blong hem bakegen. *Kompetisen blong Raetem Sot Stori: !Winim wan fri trip i go long Niu Yok Siti!*

Hem i wan kompetisen blong ol studen long plante skul long eria ia. Raina i pikjarem hemwan long Niu Yok Siti, wetem ol longlongfala bilding raon long hem mo Ston blong Libeti kolosap. !Hem i wantem blong go!

"Yu sud traem,"  
Sydney

i talem. "Yu yu bes wan blong stap raet long klas blong yumi!"

Ol toktok blong Sydney i mekem Raina i filim gud. Hem i no save fulap samting abaot fasin blong stap raetem ol sot stori. Be hem i wantem blong traem.

Afta long skul, Raina i sidaon long tebol blong hem. *Tap, tap, tap.* Hem i kilkilim pensel blong hem long pepa taem hem i stap tingting long ol aedia blong hem. Long en, hem i stat blong raet.

I tekem wan ful wik blong Raina i finisim. Be wetem sam help blong Mama, hem i filim se hem i redi blong givim raeting blong hem i go.

Sam wik i pas. Raina i wantem tumas

blong luk huia i win. !Maet bae hem i stap go long Niu Yok i no longtaem!

"Ova long wan hundred studen oli bin tekpat," Mista Wright i talem long fored blong klasrum. "Tangkyu long yufala evriwan we i bin raetem wan sot stori."

Hat blong Raina i stap pam from glad.

"Nomata we nogat wan long ol studen blong yumi i bin winim kompetisen, Raina i bin stap long ol top 5 blong olgeta we oli tekpat.

Kongratulesen, Raina," Mista Wright i talem.

Raina i smael taem ol fren blong hem long klas oli klap. Be insaed, fes blong hem i nogud. Blong stap long top 5 i no gud semmak long blong win. Drim blong hem blong luk Niu Yok i nomo gat.

Taem Raina i kasem haos, hem i sidaon long wan jea long kijin narasaed long papa mo mama blong hem. "Mi lus long kompetisen," hem i talem. "Hemia i las taem we bae mi traem wan niu samting bakegen. Bae mi mekem nomo wanem we mi save se mi gud long hem." Hem i kavremap hed blong hem wetem ol han blong hem.

"Mi sori se yu no bin win. Mama mo mi, mitufala i glad tumas long yu blong traem," Papa i talem. Hem i sidaon narasaed long Raina. "?Yu tingbaot long sam yia i pas, mi nogat wok?"

Raina i sakem hed blong hem blong talem yes.

"Mi bin aplae from fulap wok mo nogat wan i tekem mi," Papa i talem. "Mi filim se tingting blong mi i stap foldaon."

Raina i leftemap hed blong hem. "?Tru?"

Papa i saksakem hed blong agri.

"Be mi no stop. Afta long wan longfala taem, mi faenem wan wok we i stret gud evriwan. Be bae i no save hapen sapos mi bin stop blong stap traem."

Mama i putum han blong hem long bak blong Raina. "?Yu save hamas stori mi stap sendem i go long ol defren magasin?" hem i askem. "?Mo hamas oli no akseptem? Be mi no save stop nomo sapos mi wantem blong luk oli pablisim wok blong mi. Blong stap raet i impoten long mi, mekem se mi gohed blong traem."

Oltaem Raina i bin tingting se papa mo mama blong hem oli gud long evri samting we tufala i mekem. Hem i neva save se oli no bin stap akseptem tufala tu samtaem.

Hem i harem nogud yet, be i krangeke smol blong *nomo* wantem traem wan niu samting bakegen. Hemia i no wanem we Papa long Heven i wantem blong hem. Raina i disaed se bae hem i no stop. Hem i save traem sam moa samting, iven ol samting we hem i no gud long hem kwiktaem.

"Mi ting se bae mi tekpat long kompetisen bakegen nekis yia," Raina i talem. Blong lusum kompetisen i no minim se bae hem i en blong ol drim blong hem.

Raina i gobak long tebol blong hem mo pikimap pensel blong



hem. Blong stap raet i bin wan gud taem. *Tap, tap, tap.* ?So, wanem wan niu samting bakegen we hem i save raetem nekis wan? ●



"Lod i lavem hadwok, from hadwok i karem ol praes we i no save kam sapos i no gat hadwok."

Presiden Russell M. Nelson, we oli kwotem insaed long Joy D. Jones, "Wan Spesel Hae Koling," *Liahona*, Mei 2020, 16.